

COMUNICATO n. 1464 del 28/05/2025

An Font vo 3,2 mildjü euro. Dar asesór Failoni: “A hilf pittnan sotziäl vèrt un boda darzuar gitt o vèrt dar lantschaft”

Schütz zo zügla 'z vich afte pèrng un zo schütza di biodiversitét, di vorsch mochan khemmen inngètt vor atz 30 von prachant

[Cimbro] 'Z izta zait sin atz 30 von prachant innzoge ba in vorsch zo haba in schütz boma vennt drinn in auszschraib auszètt vodar Provìntz zo schütza un auszohalta berda haltet 'z vich zo pèrge. 'Z soinda khent untargelekk in gantz 3,2 mildjü euro auszohalta prodjèkte boda hãm 'z zil zo pezzra in auszgleich zbisnen arbat un lantschaft un darzuar haltn da kunt di biodiversitét, saiz da sèll von vichar saiz von èlbar un von gegres.

“Pitt disan prodjekt – khütta dar provintziäl asesór vor di beldar Roberto Failoni – böllbar auhaltn in konkrèt berda lebet un arbatet aftz üsarne pèrng, darkhennante in groaz vèrt boda dise laüt hãm zo halta di umbèlt”.

Dar auszschraib iz drinn in Natzionäl Stratègesche Plån vodar PAC 2023-2027 un iz augehaltet o vodar Européan Uniong durch in agrar european Font vor di ruralitét, von Stato un vodar autonome Provìntz vo Tria.

'Z khemmenda finatziàrt agrar arbatn zo halta di umbèlt boda nèt gem gèlt, übarhaup arbatn boda haltn in gantz di natùr, un boda süachan zo macha stian pezzar pittnàndar da agrar arbat pinn gebillt.

'Z khemmenda augehaltet arbatn zo pezzra bia ma nützt 'z bazzar von pèrng, azpe hülm, vaske, zistèrne, trögar vorz vich un impiànte zo höatra 'z bazzar o.

Darzuar bölltma schupfan zo nütza di sèlln etzan boda soìn khent gelatt gian öade un asó pezzarn di umbèlt vodar nèt Natura 2000.

Dar auszschraib gitt zuar gèlt vor berda bill machan traditzionäl zöü pitt holtz un bill richtn di sèlln pitt stuaplattn magare legante darzuar staudn un asó baz, un no eletresche sistèm zo schütza 'z vich von groazan vlaischvrèzzar un vor strukturn zo schütza di paigehäusla (Bienenhaus).

Dar schütz dekht in 70% von sèll boda khint gezert sin daz mearaste 100tausankh euro vor aniaglaz, 'z khinta darkhennt, anvétze dar 80% vor arbatn vürgelekk von forestàln Feroine.

'Z mangda inngem in vorsch di padrü odar berda nàsteat in pèrge saiz öffentlesche saiz privètt, darzuar o di pauarn, di paingzüglar un di feroine un di konsòrtzie vo disan.

Di vorsch mochan khemmen inngètt lai online vor atz 30 von prachant von 2025 aftn portàl von provintziäl agrar sistèm SRTrento aftz disan indiritzo <https://srt.infotn.it/> odar afte websait <https://a4g.provincia.tn.it/>

Alle di informatziongen punkt vor punkt mang khemmen gelest afte istituzionàl websait von Forestàl Dienst.

Übersetzt von Schaltarle vor di zung von Toalkamou vodar Zimbar Hoachebene

(us)